

# Gui'ch yaloj guxhaal San Pabl loj ree bén Tesalónica rliladx Jesucrist

<sup>1</sup> Naj, Pab con Silvan nē Timoteo, cayxhaalan gui'ch guie par läjt najdi bén rliladx Jesucrist luguiedx Tesalónica, dux Dad ree Dios nē Dad Jesucrist güünle' läjt yabe'cdxe tēë reeman luxdoodi.

## *Rudëë Pab quixtëë loj Dios*

<sup>2</sup> Guixie guixie radëën quixtëë loj dux Dad ree Dios por gradi, rasaaladx tēën läjt chi rarejdx ranaaban laaman. <sup>3</sup> Nē zianczi chi rarejdx ranaaban laaman, nadxe'duguijcan ni ma beendi guial rliladxidi laaman, nē guial rēn lasa'di, nadxe'duguijc tēën guial cadaandi cabëzidi gui't Dad Jesucrist stijb. <sup>4</sup> Compniar raliduladx ree Jesucrist, dunujn rayagbee guial Dios rēn läjt, gulej tēëman läjt. <sup>5</sup> Din chi baneen xtiidxza'caman lojdi, ad diidxtizi balüün läjt, balüün läjt con xguialrni-abee xSprijt Dios abi' rayagbeen guial diidxli naj ni caynan lojdi. Läjt ragbee xhienaaag babajnan chi badxu'nē'n läjt, babajnan zian din yaguieenan läjt yudar xhienaaag guibandi.

<sup>6</sup> Abi' läjt nabandi zi'c babajnan lojdi nē zi'c balüü Jesucrist, abi' por xSprijt Dios babaadi bililadxidi ni banan lojdi, maksi dād guzagdiajdi.

<sup>7</sup> Zian najdi tijb ejempl par gra ree bén rliladx Jesucrist niz Macedonia nē niz Acaya. <sup>8</sup> Por läjt bire'ch xtiidxaman ad tijbtizi luarzii ree, gra ladczi ruza't

reeman xhienaaag rliladxid Dios, xt ni'qui chetri ryaadx yaguie'chan. <sup>9</sup> Din laagajc reeman rü diidx xhienaaag baca'di dunujn chi budganajn läjt, xhie tée naag basa'ndi ni naladxidi naj ree dios persi binalidi quibj Dios naban abi' guzuloj cayüjndi laaman sirv. <sup>10</sup> Rü tée reeman diidx xhienaaag cabëzidi gui't Jesucrist Xi'n Dios diizd xanyabaa, bén basbanman loj ree bengüt, Jesús bén rabëë dunuj ree loj casti ni zëed.

## 2

### *Ni been Pab luguedx Tesalónica*

<sup>1</sup> Lëjt ragbee, compniar raliduladx ree Jesucrist, guial ad budganaj xlia'tzan läjt, <sup>2</sup> majsi läjt ragbee guial luguedx Filipos guna ree bejn diidxguijdx du lojn në graloj ree guialzi badëëd reeman dunujn. Per Dios banee dunujn valor persi badün xtiidxza'caman lojdi, majsi xhietëez raza'can por ree bén rdxe'ch dunujn. <sup>3</sup> Din ad baneenë'tan läjt diidx rusquiee, o par yaguieennë'n läjt zi'ctzi rayënan ya, o par yasquieen läjt, <sup>4</sup> per zi'c bacaabee Dios dunujn din yaneen xtiidxza'caman guial baguiaaman zile' yaguieenan ni rayal yaguieenan, laanan naj ni radün ad par yaya'ntan zagdxe loj ree bejn, par yaya'nan zagdxe loj Dios, bén ragbee gra ni yu' luxdoo bejn. <sup>5</sup> Lëjt ragbee guial ad yu't dxej baneenë'n läjt zagdxe naabzi par guiëndi dunujn,ache téeet guijc badxiiban din yaca'n xmiliadi. Dios ragbee guial laan naj diidxli. <sup>6</sup> Ad radiiltan guza't ree bejn dunujn zagdxe, ad radiil téeetan guza'tidi dunujn zagdxe, o guza't ree ben ren dunujn zagdxe, <sup>7</sup> majsi guial

nayajcan xiapóstol Jesucrist, raya'pan derejch yanabeen läjt güundi xhienin par dunujn, per ad raguieentan zian. Läjt ragbee guial benza'c bayajcan chi badxu'në'n läjt, zi'cgajczi tijb na rusni's rniah tħej xi'n. <sup>8</sup> Abi' guial tant rayēnan läjt, ad tibbtzi xtiidx Dios baneen lojdi, n̄e dux guialnaban bayēnan naneen por läjt, guial tant rayēnan läjt. <sup>9</sup> Abi' läjt ragbee compniar, guial dād baguieenan dxiin. Dxej guiaal baguieenan dxiin, chitħe ħali' n̄e xchiindi guial güundi dunujn yudar yabajnan la'tgaj balūn läjt xtiidxza'c Dios.

<sup>10</sup> Läjt n̄e Dios ragbeeħħaaw guial chi badxu'në'n läjt, babajnan xnejz zi'c rayal, abi' achet chile' gudxiibidi du guijcan, läjt bén rliladx ree Jesucrist. <sup>11</sup> Läjt ragbee xhienaa baneen läjt consejw, xhie tħej naag balu'n luxdoodi zi'c rüjn tijb dad con ree xi'nman. <sup>12</sup> Ma banan lojdi din guibandi zi'c rayal guibana bén ma naj ree xbejn Dios, bén rbejdx läjt din yayalidi xanyabaa lod rniaebeeman.

<sup>13</sup> Zeel n̄e dunujn ad racwēēzt radēēn quixtēē loj Dios, guial chi biguiejndi xtiidxaman ni banan lojdi, bidxga'di laan zi'c xtiidx Dios ad zi'ctzi xtiidx benguidxliu. Abi' diidx guin ree naj ni rusni xquiarguejndi, läjt guial rliladxidi Jesucrist. <sup>14</sup> Abi' läjt compniar raliduladx ree laaman, ma guzajquidi zi'c guzac ree xbejn Dios, bén Israel zojb ree niz Judea, bén rliladx ree Jesucrist. Din zi'cgajc basagdaj ree bén ladxidi läjt, ziangajc basagdaj lasa' bén Israel reeman laa reeman. <sup>15</sup> Abi' tħej ree bén Israel bagħiżt reeman Dad Jesús, zi'cgajc bagħiżt reeman bén badēēd ree xtiidx Dios loj ree bejn, balaagħxa tħej reeman dunujn, ad

rüjnt reeman zi'c rën Dios, abi' contzi gra bejn rdxe'ch reeman. <sup>16</sup> Rudxoon reeman yalüün bén ad najt ree bén Israel xhienaaag gac reeman perdon, zian laagajc reeman cutioob guijc xtol reeman, abi' yan ma cadëd reeman xcastiro' Dios.

### *Guyën Pab niejman Tesalónica stijb*

<sup>17</sup> Compniar raliduladx ree Jesucrist, chi basa'nan lëjt tio'p choondxej, mäjsi ad raguaatan lëjt, per rasaaduladxan lëjt, abi' rayën nejzdoon yaguiaan lëjt stijb. <sup>18</sup> Dád bayënan nudganajn lëjt. Naj Pab, zien volt da't guyënan nidganajn lëjt, per badxoon xindxab niajc zian. <sup>19</sup> Per yan sta rayënan yudganajn lëjt, din ni ralëjzan naj guial lëjt ragu' du luxdoon zagdxe. Lëjt naj dux chiinan ni rabaanë'n yubiignë'n loj Dad Jesucrist chi gui'taman stijb. <sup>20</sup> Lëjt naj bén rabaanë'n rlies tëëdi dux valoran.

## 3

<sup>1</sup> Zeel chi badxu'n luguidex Atenas, ad radaantran, ma rayënan yayagbeen xhienaaag za'di, dxel baguieenan xgab baya'n du xtijban ni. <sup>2</sup> Abi' baxhaal dux compniaran Timoteo, bén cayguieennë'n xchiin Dios caytie'chan xtiidxza'c Jesucrist, din yagu'man luxdoodi sudxi'chidi loj ni ma rliladxidi, <sup>3</sup> din ni'qui tibidi ad zalenya't por ree guialzi ni cadëdidi, lëjt ragbee guial zian yaza'c ree. <sup>4</sup> Chi badxu'në'n lëjt, banan guial dád zien loj guialzi yadüüd ree, abi' lëjt ragbee guial laan naj ni ma gojc. <sup>5</sup> Zeel ad gudaantran, abi' guxhalan Timoteo din gagbeen xhienaaag zinalidi

ni rliladxidi, din rdxeban gusquiee xindxab läjt, abi' achetri sirv nüjn ni baguieenan por läjt.

<sup>6</sup> Per yan ni ma baguiaad Timoteo ni bidgana-jman läjt, ma bagojnman dunujn guial zinalidi zagdxe ni rliladxidi Jesucrist né zi'c rën lasa'di. Laaman na guial zianciyu' luxdoodi zagdxe rasaaladxidi dunujn, abi' däd ma rëndi guguaadi dunujn, zi'cgajc rayënan yaguiaan läjt. <sup>7</sup> Zeel, compniar raliduladx ree Jesucrist, majsi graloj tarbajw né guialzi caydüüdan, per däd nix yu' du luxdoon ragueijnan guial zagdxe zinalidi ni rliladxidi. <sup>8</sup> Abi' yan mazri nix ma bayu du luxdoon guial ma bayagbeen za'dxi'lchquidi loj ni zinalidi xnejz Dad Jesucrist. <sup>9</sup> Dxel xt ni'quid radxejltan xhienaa yadëen quixtëe loj Dios por läjt, guial däd nix yu' du luxdoon lojman por läjt. <sup>10</sup> Dxej guiaal radi'n ranaaban lojman din guneman mod yudganajn läjt, abi' lox yanan lojdi ni ryaadx gagbeedi xcwent guial rliladxidi Jesucrist.

<sup>11</sup> Dux Dad ree Dios né Dad Jesucrist gagnë dunujn din gac yudganajn läjt. <sup>12</sup> Abi' Dad Jesucrist gagnë läjt din gusnuu guiën lasa'di mazri, guiën téeedi gra lasa' bejndi zi'c rayënan läjt. <sup>13</sup> Laaman gagnë läjt sudxi'chidi loj xnejz Dios din sudi naya sin dol lojman, dxej ni gui't Dad Jesucrist stib con gra ree xbejnman.

## 4

### *Zi'c rën Dios guiban ree xbejnman*

<sup>1</sup> Yan, compniar raliduladx ree Jesucrist, raza'can läjt liaadx, rana téeen lojdi por laaman, guial zi'c nabandi yan zi'c ma balüün läjt guibandi,

din güündi zi'c rën Dios, gol been naguiejn gol basnuu mazri guibandi zi'c rënman.

<sup>2</sup> Din lëjt ma ragbee gra ni guxhaal Dad Jesúus dunujn yanan ni güündi. <sup>3</sup> Ni rën Dios naj guial guibandi naya lojman, guial ad güündi nidxuudx ree con ree bén ad najt lacheelidi. <sup>4</sup> Gol gogbee guial tijbgaj lëjt rayal guibannë lacheelidi zagedxe zi'c rën Dios con respejt, <sup>5</sup> ad chu' lacheelidi naabzi par grii xgustidi zi'c rüjn ree bén ad nünbeet Dios. <sup>6</sup> Ni'qui tijbidi ad rayalt güünnaladx lasa'di, gusquiee lasa'di güündi xhie nidxuudx con lacheel reeman. Din dux Dad ree Dios zudëédaman casti gra ree bén rüjn zian, zi'c ma banan lojdi zi'c ma bagojnan lëjt. <sup>7</sup> Din Dios ad gurejdxtaman dunuj ree yayajc ree xbejnman par yabajn ree nadxuudx, gurejdxaman dunuj ree par yabajn ree naya. <sup>8</sup> Zeel bén ad ridxga't ni ma banan lojdi, ad benguidxliujtan ad ridxga'taman, Diosan ad ridxga'taman, bén razaladx xSprijt duloj ree.

<sup>9</sup> Yan, xcwent guial guiën lasa'di, ad ryaadxt yanan lëjt xhienin xcwentan, din lëjt gajc ma basiid por Dios xhienaag guiën lasa'di, <sup>10</sup> abi' laan naj ni cayüjndi con gra dux compniar ree bén rliladx ree Jesucrist niz Macedonia. Per raza'can lëjt liaadx din gusnuu guiën lasa'di mazri. <sup>11</sup> Gol been tée naguiejn guibannë lasa'di zagedxe, gol guyu xgab xchiindi, zi'c ma ranan lojdi güündi dxiin, <sup>12</sup> din guibandi zagedxe loj ree bén ad rliladxt Jesucrist nö chitëë xhie guiyadxidi.

### *Ni gac chi gui't Dad Jesucrist*

<sup>13</sup> Yan, compniar raliduladx ree Jesucrist, ad rayëntan guibandi sin guial gagbeedi xcwent ree

bengüt, chitëë chu'nayadi zi'c ree bén ad rliladxt Jesucrist. <sup>14</sup> Din bal raliduladx ree guial güjtaman abi' babanman stijb, ziangajc raliduladx ree guial ree bén ma güjt, bén bililadx ree laaman, yasban Dios laa reeman por Jesucrist.

<sup>15</sup> Zeel zi'c ma rayignia'n xtiidxaman, dunujn rana lojdi guial gra ree xbejnman, bén sta naban ree chi gui'taman stijb, ad zanedt reeman loj ree xbejnman bén ma güjt ree. <sup>16</sup> Din dxejzii guiguien cha' bén rniabee xhienaag gac, guiguien cha' anjl rniabee ree anjl, guiguien guibejdx xtrompejt Dios. Dxel guiat Dad Jesucrist diizd xanyabaa, abi' yaloj ree xbejnman bén ma güjt ree yaban stijb. <sup>17</sup> Guiáad dux compniar ree bén sta naban ree dxejzii, yadxaag ree con ree bén baban guin, dxel yo' ree ladya loj ree zaj lod yadxaag ree Dad Jesucrist. Zian yo' ree yuchu'në' reeman tiblayaa. <sup>18</sup> Zeel gol bagu' luxdoa lasa'di con ree diidx guin.

## 5

<sup>1</sup> Yan, compniar raliduladx ree Jesucrist, xhie dxej gac zian o goc gac zian ya, ad rüjnt naguiejn ganinan läjt. <sup>2</sup> Din läjt ragbeechaaw guial zi'cgajczi ri't tijb bengubaan guxhin, chi achut rböz laaman, zian guidxin dxej gui't Dad Jesucrist stijb. <sup>3</sup> Chi guiëb ree bejn: "Zagdxe zio' ree, achet gac", dxel dxejczi gui't guialzi par laa reeman ni ad zariit reeman loj, zi'c chi rdxin hor ragnaa lën benguna chi ma gal xi'nman. <sup>4</sup> Per läjt compniar, ad zëtridi loj nejzmal din guiniaaz dxej ni gui't Dad Jesucrist läjt zi'c chi ri't tijb bengubaan. <sup>5</sup> Din graczidi ma zinal Dios, zinalidi xnejzaman, nejz nayni. Ad zunaalt ree nejz mal, nejz nacay.

**6** Zeel ad najt guial yabajn ree zi'c tijb bénnaayëjs, zi'c rüjn los demazri ree bejn, rayal yatie'ch dux bacaal ree, yadxu' ree nadëdguiendxuj. **7** Bén zinal ree nejzmal zi'c tijb bénnaayëjs, zi'c tijb bengu', zian zinal reeman nejz guin. **8** Per dunuj ree, guial ma zunaal ree xnejz Dios, guidib tiamp naj guial yabajn ree nadëdguien. Yadxu'dxi'ch ree loj guialrliladx ni ma raya'p ree në loj ni rën Dios dunuj ree, abi' yadxu'dxi'ch tëë ree në loj ni ma raliduladx ree guial ma raya'p ree perdon. Abi' zi'c tijb xin suldad yu' xcascwix ni rutëë yaya'p tëë reen zi'c tijb ni gutëë dunuj ree loj ni mal **9** Din ad gurejdxt Dios dunuj ree par yayal ree xcastiman, gurejdxaman dunuj ree din yayal ree perdon por Dad Jesucrist, **10** bén güt por dunuj ree, din majsí nabajn ree o ma bayëjt ree chi gui'taman stijb, per yo' ree yuchu'në' reeman. **11** Zeel gol bagu' luxdoo lasa'di gol been tëë yudar lasa'di din gagbeedi mazri xtiidx Dios zi'c ma cayüjndi.

### *Ni rayal güün ree bén rliladx Jesucrist*

**12** Compiiar raliduladx ree Jesucrist, raza'can lëjt liaadx, gol gojp respejt bén rusiid ree lëjt xtiidx Dios, bén rulüü ree lëjt rnieenë tëë reeman lëjt xhienaag chinalidi Jesucrist. **13** Gol gojc benza'c da't con laa reeman, gol guyën da't reeman por dxiin cayüjn reeman. Gol gubajnnë lasa'di zagdxe.

**14** Ranaab tëën lojdi compniar, gol guneenë ree bén ad rënt güün dxiin, gol bagu' luxdoo ree bén ralenya'në xnejz Dios, gol been tëë yudar bén ad za'dxi'cht ree loj xnejzaman, gol gojp pacens gra reeman.

<sup>15</sup> Gol been nagueijn ad güündi ni mal bén rüjn ree läjt ni mal, zagdxeli gol gojc benza'c con lasa'di në con gra ree bejn. <sup>16</sup> Gol badxe' luxdoodi zagdx zianczi. <sup>17</sup> Ad gucwéez cwedx guiniabidi Dios. <sup>18</sup> Gol badëe quixtëe lojman por gra, din zian rënman güündi, läjt najdi xbejn Jesucrist.

<sup>19</sup> Ad rbexuudi nabee xSprijt Dios läjt. <sup>20</sup> Gol bidxga' ni rniece ree bén rudëed xtiidxaman. <sup>21</sup> Yaloj xgaj gol gogbee zagdx xhietëéznin, dxel gol been ni naj zagdx. <sup>22</sup> Gol gubi'ca loj gra ree ni mal.

<sup>23</sup> Dios, bén rabe'cdxe luxdoo bejn, laaman gagnë läjt din gaquidi lojman naya guidiblagaa. Laaman gagnë xcuerpidi, gagnëman xspriftidi në guidiblagadi din gaquidi nayadxuj lojman dxej gui't Dad Jesucrist. <sup>24</sup> Abi' Dios güün zian, din laaman, bén rbejdx dunuj ree par güünman dunuj ree xbejnman, rüjn xtiidxaman cumplid.

### *Diiidx bigra ca ree loj gui'ch guie*

<sup>25</sup> Compniar raliduladx ree Jesucrist, gol gure-jdx gunab Dios por dunujn. <sup>26</sup> Gol badëe xtiidx Dios da cwentan loj gra ree compniar rliladx Jesucrist. <sup>27</sup> Abi' por laaman, naj rni lojdi rniabee tëen läjt: Gol biil gui'ch guie loj gra ree compniar rliladx laaman. <sup>28</sup> Dux Dad ree Jesucrist güünle' läjt.

## Xtiidx Dios

### New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
fb4ebcb8-e1f4-5bfc-b08c-f590e137d86d